

مکملہ ادبی و سیاسی رسالہ

ادبی و سیاسی رسالہ اسبوعیہ در

۳۱ نجی سنہ

۲۵ ربیع الاول ۱۳۳۰

پنجشنبہ

جزو عدد : ۱۳۷



پروسیاده تصرف صندوقلری

زمانمزد بر ملت و دولت ایچون اسباب قوت و مکتنتک ال بیوکنی ثروت و احوال اقتصادی سنده کی فیض و برکت تشکیل ایلدیکی و ثروتک ال مهم و سائط استحصالیسی ایسه صنایعک ترقیاتی ایله تجارتک وسعتدن و بالخاصه افراد ملتک قاعده تصرفه فرط رعایتندن عبارت اولدینی معلومدر . حتی امر تصرف ، تأسیس و تشکیل ثروت خصوصنده و سائط سائر یه تقدیم اولنه بیلور . بوگونینه هرکسک بیلدیکی حقایقندنرکه فرانسزلرک تجارتی ده ، صنایعی ده خیلیدن خیلی کیروده قالمشدر ، بونکله برابر فرانسه ، الیوم نقد موجود و مدخری اعتباریله دنیانک ال زنکین مملکتی عد ایدلمکدهدر . و حقیقت حالدهده بویلهدر . بوگون دول معظمه و صغیردن هر هانکیسک پاریه احتیاجی اولسه ایلک باش اوردینی مملکت فرانسهدر . فرانسهک ، احوال تجاریه سنک حال تدنیده اولسنه رغماً ، بویله مقدار ثروتجه برنجی درجهنی محافظه ایتمسک باشلیجه اسبابندن بری ده افراد ملتک قاعده تصرفه پک زیاده رعایت ایتملرندن بشقه برشی دکلدر . فی الحقیقه فرانسزلرک اقتصاد پرورلکلری ، اداره لری یالکیز کندی آرملرنده دکل ، حتی ملل اجنبیهده بیلله مثل سائر حکمنه یکمشدر . اساساً فرانسهده خلقک تصرف قاعده سنه رعایتی ترویج و تسهیل ضمننده پک چوق مؤسسات موجوددر . که عمومی تصرف صندوقلری بوجهلنددر . - پاره تصرف ایتمک ، کار و کسبک بر قسمتی بانقلره یاتیرمهک ، بر ملت ایچون نه بیوک اسباب قوتدن معدود اولدینی بویله معظم بر مثال ایله ثابت اولنجه دول متدنه سائر نکده بواصول معقوله یه امتثال ایدمککلری طبیعی ایدی . نته کیم ، ترقیات مدنیهک کافه شعباتنده برنجی مرتبهنی احراز داعیه سیله اوتوز قرق سنه دن بری هر درلو قواسنی بومقصدنه تخصیص

ایدن آلمانلرده فرانسه لرنک اثرینه اقتفاء مملکتلرنده برچوق تصرف صندوقلری
تأسیس ابتدکاری کی، آلمانیا حکومتی ده تبعه سنی تصرفه آلیشدیرمق ایچون هر درلو
تشویقات ماده و معنویه یی ابدالده قصور ایتمامکده در. آلمانلرکده بالخاصه صوگ سنه لر
ظرفنده بویولده وقوع بولان سعی و همتلرینک نه درجه لرده نمره دار اولدینی ایسه
یالگیز پروسیاده تصرف صندوقی مؤسساتنک ایوم بالغ بولدینی مقدار پک کوزل
ارائه ایدر .

بویولده (استاتستیکه قورمه سپونده نس) یعنی (استاتستیک مخبری) عنوانیه
انتشار ایلکده اولان رساله ده کوردیکمز ارقامی، افاداعزى تأییداً نقل و ترجمه ایله
ارباب مطالعه نك نظر اعتبارینه عرض ایلیورز :

۱۹۰۹ سنه سی نهایتده بتون پروسیاده کی تصرف صندوقلرینک مقداری
(۱،۶۹۲) عدده بالغ اولمقده ایکن ۱۹۱۰ ده بو مقدار (۱،۷۱۱) عددی
بولمشر .

بو صندوقلره ۱۹۱۰ سنه سی ظرفنده تودیع ایدیلان نقودنک مجموع یکونی
تمام (۱۱،۱۰۶،۷۹۳،۴۹۷) مارقى طومشمشر . برسنه اولکی تودیعاتنک یکونی
ایسه (۲۰،۳۳۲،۲۳۱،۷۲۷) مارقدن عبارتدر . شو حالده برسنه ظرفنده
تودیعاتده (۷۷۴،۵۶۱،۷۷۰) مارقلق برتزايد وقوع بولمشر .

نقود مودوعه نك آدم باشنه اصابت ایدن مقدار متوسطه کلنجه بومقدار
۱۹۰۹ سنه سنده ۲۵۹ مارق ایکن ۱۹۲۰ سنه سنده ۲۷۶ مارق بالغ اولمش . یعنی
برسنه ظرفنده ۲۸ مارق تزايد اتمشر .

تودیعات متوسطه ۱۸۵۰ سنه سندن بری هراون سنه ده جدول آتیده کوسترلیدیکی
مقادیرده آتمشر :

مارق	سنه
۳،۲۷	۱۸۵۰
۹،۲۹	۱۸۶۰
۲۰،۱۷	۱۸۷۰

مارق	سنه
۵۸,۴۶	۱۸۸۰
۱۰۹,۵۵	۱۸۹۰
۱۶۶,۶۸	۱۹۰۰
۲۵۹,۴۰	۱۹۰۹
۲۷۶,۶۸	۱۹۱۰

شوارقام آلمانلرک الی سنه ظرفنده اصول اقتصادده ندرجهلرده ترقی ایلدکلرینی واضحاً ارايه ايدر . شایان تأسفدرکه اوج سنهدنبری داخل اولدیلغمیز دوره تجددده بزم ارباب حکومت اقتصاد وتصرفک بوکون حیات دولده حاز اولدیلینی تأثیر عظیمی قطعياً تقدیر ایدمیش . خلقده حب ومیل اقتصاد حاصل ایدمچک هیچ بر تشبندده بولنمامش ، تصرف صندوقلری وسائر کبی مؤسسات مفیده وجوده کتیرمدرک افراد ملت نظرنده اقتصادپرورلکک اهمیتینی ابراز ایلده (خیرالناس من یتق الناس) سرینه اثبات لیاقت ایدممامشدر .

